

### **'t Kink in der sjtaal**

't Vruus dat 't krakt  
D'r kouwe winkter houw os gepakt  
De riep hingt a gen beum  
't Is wie inne sjoeëne dreum  
't kindje in de krib dat lach  
Mar vier wille ummer mieë mach

't Vruus, d'r sjnei is hagelblank  
De kirkklokke loewe oere-lank  
Vier sjture wunsj-kate durch 't lank  
Aa jieëkerinne deë v'r kinne, of hont gekank  
Mar kieëk nogins um dich hin  
Hat dat egelig noe nog zin?

Jan Halmans.

### **Sinte Berb**

Kót vuur de fieësdaag va Sinte Berb woeëd op inne zieëkere pos, onger de koellüj gesjproake of ze murge och op d'r pos zouwe kóme.

Of gonge ze Sinte Berb viere in 't patronaat?

't Woare allnüj gesjikde köaler, en doomit good geleuvig.

Besjloate woeëd um deë daag neet noa de koel te goa.

Wie ze d'r pos houwe verloate, woar hunne pos reen en good achtergeloate.

Ze vierde deë daag Sinte Berb in hün patronaat.

Wie ze op vief december op de koel trük koame, vonge ze d'r pos intussje i gevalle ..... weë wit, went ze gister gewirkt houwe da woare (veróngersjeld) ze verongelukt.

Jan Halmans.

### **De Sjtërre**

't Gewig va de sjtërre  
Aan de uëverzieë sjient  
In d'r top va inne krisboom  
Ing sjtölse sjtèr

Neëve miene telder sjtook ing servet  
Hèl geel, mit zes punte  
Bij 't leeg van d'r zilvere  
Kandeleer mit zieëve erm  
Brook d'r vadder  
't Gevlochte broeëd  
Nog noeëts sjmakde dat zoë zaut

Jan Halmans.

### **Wit**

Wit is der grónk

Wit is der weëg  
Es ich der sjtoep neet veëg  
Wit zin de sjtruuk en de moere  
En wit is de hék  
Inne voeëgel zit te loere  
Noa eek leen sjtukske wek

Wit is 't graas  
En gries is de loch  
Wit is mieng vinsterglaas  
Wit zint de vlökskes en zach  
Ich keek noa inne voeëgel en dach  
Dae hat ng noeëts gevas!  
De kater sjlieëpt mar wach op de nach!

Jan Halmans.

### **Sjwarte piet**

Pas gelêje presenteerde ze op de TV. de nuuje Piet mit èè Roeèt gezich,  
Woeërom in èns al diej kleuère, dach ich, noa dat bericht,  
Zint de kïnjer vueèr dea nùuje Piet soms minder bang ?  
Of jieècht me os mer get op sjtang ?  
Van kïnjd aaf kèn ich sjwarte Piet mit èè swjart gezich,  
Ziejn ich dat verkiejrt, likt 't àà mich?  
Ziejn hoare woare oranje gekleuèrd,  
Dat is toch neet wiej 't hueèrt,  
Wea hèat dat bedacht, of wolle angere dat?  
Wiejnieè weare v`r dat, "angere wille dat" zat,  
Höbbe viejr Hollenjes geen inspraak mij,  
Of bliejve v`r wiej `n kat om de heete brei heen drieè,  
Loat oeès sjtöm hueère, viejr tälle toch mit,  
Vroag èns àà jwarte Piet of hea doa neet mit zit?  
Of hea doa neet zoeè sjwoar àà tilt,  
Omdat vueèl luuj al diej klueère neet bevilt ?,  
Viejr zint toch gèè vot mit oeère,  
En loate os doeèr angere de mondj sjnoeère,  
De kïnjer zolle dea echte Piet vast misse,  
Loate v`r os de zeek neet lauw make,  
dat diej angere aerges angesj goan pisse,  
Viejr zint toch insjtoat om zelf te besjlisse.  
Dan mot 't Wilhelmus oog verangere,  
Viejr höbbe toch gee Dútsj blood,  
En mit de Kueèning van Sjpanje höb ich oog niks.

Jan Theunissen.

### **De Wintjer**

Ooch al is de wintjer duuster en koud,

Dan komt g`r mit inne kilo of tiejn zout,  
De wintjer waal doe`r, oane probleme,  
En doe`d de kans op valle verkleene.

Jan Theunissen.

### **De Advent**

Is ene belangriejke tiejd doe`r `t joar,  
Letterl`k bet`kent `t " Er aan komen"  
`t Is inne joarl`kse trend,  
Op wee`m v`r wachte is iejder`e bek`nd,

De Adventskrans wue`rd gemakt van dennet`k,  
Diej bliejve `t langst greu`n,  
`t Greu`n symboliseert " `t iejwig leave"  
Dat giejft os houvast en sjteu`n,

De Advent is inne tiejd van bezinning,  
Op de geboorte van de zoon van God de Vader,  
Ziejn komst is de ue`verwinning,  
En kumt iejder weak nader,

De vee`r kearse wiejze noa `t joar mit ziejn vee`r seizoenen,  
Iejdere Zonjig van de Advent wue`rd een kears miej aangesjtoake,  
Woe`biej een sjtrofe van `t "Rorate Coeli" wue`rd gezonge,  
Op vee`r en twintjig december eindigd de Advent,

De Kristiejd doe`rt tot de zonjig van de Deup van Jezus,  
Dan brik me oog de krissjtal aaf,  
Mer de meeste luuj doe`n dat al op drij kue`ningen,  
En vinge`t dan weer good geweast.

Jan Theunissen.

### **Krismes viejre**

`t Is koud, `t snie`jt en bed`kt de denne beum,  
In hoe`s brenne lempkes t`sjje tekskes van denne greun,  
De kirkklokke sjloan twelf oe`re,  
Mer `t zal nog ee paar sjtond doe`re,  
Dan goan v`r noa de Nachtm`s,  
Want `t Kriskientje is geboare,  
Dat ged`nkt me al mie` dan twiejdoe`zend joare.

Opweag noa de kirk ziejn viejr ue`veral krisbeum sjtoan,  
Mit gekleu`rde lampe diej om de buurt oe`t en aan goan,  
`t Is dr`k van alle k`nj komme luuj aa gelope,  
En jus wiej viejr in de kirk kearskes kope,  
Diej sjteake v`r aan ter iejre Gods,

En doeën dat mit gepaste trots,

Noa de Mis drènke v`r heem gezellig èè gleaske,  
Want Krimes vingt in iejders hart èè werm plaetske.  
Ich weet `t is neet iejderee gegeave,  
Vueèle doeën Krimes op hun manneer beleave,  
Ziej meene `t goot mer hōbbe neet de mood,  
Om dat hun hart nog geen vreej mit `t geloof sjloot.

Jan Theunissen.

### **Krisnach wiej 't vreuger woar**

Mit sjnieë doa boete  
Dea dwarrelde teage de roete  
De vlokke i de windj  
Woar geer noch ee kindj  
Es groeëtvader verhoale vertildj  
Va 't Kriskindj dat is geboare en  
Va d`r hieëmel en de weldj  
Ee Krisnach wiej 't vreuger woar  
Inne krisboom mit ingelehoar  
In 't krupke ligk 't kindj  
Boete 't fleute va de windj  
Ee Krisnach wiej 't vreuger woar  
Zoeë helder zoeë kloar  
Zoeë zieëlig zoeë vroeë  
Dat wunsj ich mich zoeë  
Sjteevas op Hillige Oavendj,  
Biej pap en mam.  
In fieëstelik gewandj  
En in 't kirkske  
't Loewe va 't klukske  
D`r Krisboom vol mit wonjer  
Mit pekskes dronger  
Ee Krisnach wiej 't vreuger woar

Jan van Haaf.

### **Kloare decemberdaag.**

Kloare decemberdaag  
Woeë op ee zjwerverskindj  
Gods ieësjteling  
In der sjtal te sjloape lik  
Doeër de herdesj truij bemindj  
Maria's leeveling  
Ee sjtar die huj brent  
Bringe va ee riek landj  
Drij kuëninge allengs noa Betlehem

Doa huërde ziej zachte sjtumme zinge  
Va ingele in 't besjnieëd veldj  
En volgde de sjar die boave d`r sjtal sjtong  
En fonkelde es woar dat vuërsjpild  
't Leeg dat zie woar vuërgedange  
Doa loog in Moeëderssjoëët  
Op 't insigste sjtukske helder linne  
't Welds en Gods kleennoeëd  
Ee nuuj beginne

Jan van Haaf.

### **D`r Wintjer**

Me deed d`r veuël uëver kalle  
En neet jieëderree deed 't bevälle  
Mer de wintjer va dit joar  
Doa kump ginne mit kloar  
Reëge, gevruur, doeëj,snej, ee op en neer  
Doe wieërs gaar va dit onbereakenbare weer  
Gieëkerinne head waal verkoudheed of griep  
Dizze wintjer kin alleen mer geniep  
Mer al doeërd d`r wintjer lank  
't vuurjoar sjteed al i-de gank  
Dooch dich werm aa en gank droet  
Neet zitte blieve in de boet  
Zurg ummer vuur ee good gemood  
Da kump alles weer good.

Jan van Haaf.

### **Barbaraviering**

Op 4 dec is Barbaraviering; Berbke is de patrones va de koelluuj.  
Deë daag woeërd ummer good gevieërd.  
leësjt allenuij noa de kirk,doanoa ginge vier noa 't Unitas.  
Later 't sjuttjesjhuuske doa woeërd ene sjteveige op de lamp gesjod.  
Da woeërd aa gesjoave aa de koffiedusj.  
Noa ene hoop kal doeër de baze ginge vier aa de vla en bruëdjes  
Da woar ummer een loaterie,mer alles wat eëtbaar woar woeërd  
burgemeester gemak en vier houwe da de grootste lol.  
Vier sjtonge mit zo'n 20 man aa de teek: "Geëf hiej ene!"  
En zoeë ging dat doeër,koelpiete woare duësjtig!  
Kins te dich waal vuursjtille wiej de aafloop woar  
Opins woar 't zoeë wiet,ene hou te veuël a bachus geofferd  
En zoot liek bleek op de eërd va de hieëre w.c.  
Doe ging 't loos.de wc bril woeërd losgemak en heum omgehange.  
Blome in de henj gedoa en doe de fotograaf besjtild.  
Mit nuijoar kreges alle koempels een nuijoarskaart mit zien foto,  
en mit de biste wunsje!

Jan van Haaf.

### **Ooch de Herfst heët zien charmes**

De blaar valle weer van de beum,  
De natuur is oetgebluid en minder greun.  
Mér wat loate die blaar zieën vuur 'n kluëreprach,  
Déks nog sjoener es-te houws gedach!

't Weer wurd minder en 't wurd al kouwer,  
Weer bienoa 'n joar vuurbie, vieër weëre ouwer!  
Af en toe kumpt d'r al 'n reëgebuuj,  
De zoeëmer is vuurbie biste luuj!

De vuëgel vinge dat ze weg motte goan,  
Ze zeuke wermere oorde op om wieër te kinne besjtoan.  
Mér ze komme weer truuk, volgend joar,  
Es ze tenminste uëverleëve alle gevoar!

't wurd ieërder duuster en later leech!  
Omdat de zon in de zoeëmer ieërder opsjteeg.  
De daag weëre korter, de nachte langer,  
Vieër motte weer wachte op 't één en anger.

Joamer dat is afgelope wat vieër achter os loate ligke,  
Mér vieër hoove uch toch zieëker neet te zigke,  
Dat d'r ooch charmes zunt aan dizze tied van 't joar?  
Gank d'r noa op zeuk en doe zals zieën: 't is ech woar!

Ron Logister.

### **Adventstied**

Op d'r veerde zondig vuur krismes wurd gevierd,  
Sjart de Adventstied zoeë is os altied gelierd  
'n nuuj kirkelijk joar sjeet dan op 't punt van beginne  
'n tied van bezinning, ooch dat mot waal ins kinne

't woeërd Advent kumt aaf van "Adventus" oet de latiense taal,  
Mer wat betekent deë advent noe precies, weten v' r dat allemoal waal?  
Dat wurd hie noeë vuur jieëdereë oetgelag,  
Dan is ooch dat tenminste ins 'n kiër gezag!

"Adventus" betekent "komme" in ozze eëge taal,  
Mer alleen dat te weten is toch waal hieël erg kaal!  
Dat dit 'n verwiezing is noa 't miensjweëre van 's Levenhieër op eërd,  
Is om te weten toch al weer van veuël groëtere weërd!

Precies gesjtilt verweist 't noa de komst van ziene zoeën Jezus Christus,

Deë, zoeë es v' r zouwe motte weten, wurd geboare mit de Krismes.  
Juus op dit fieës is de Adventstied de vuurbode,  
Mer 't is ooch een tied van boette en inkieër, dink ooch os aan ozze geboden!

D' r Adventskrans is 't meest bekinde Adventssymbool vuur os,  
Dat is inne krans deë liet dich in die tied ooch absoluut neet los!  
Woeërom is deë Adventskrans bedach, is doa uëver noagedach?  
Dat wurd noë dan ooch meteen hië mer oetgelag!

Deë krans is gemak van dennetek en die blieden ummer greun,  
Heët dat noch 'n betekenis of is dat egelik hieël geweun?  
Geweun is 't neet, want 't is 'n verwiezing noa het ieëwige leëve,  
Mer kint os ooch genug vruid in de Adventstied geëve

De 4 keërskes weëre op de veer zondige achterevolges aagemak,  
Ooch dit is neet zoeë mer get, mer 'n symbool dat os altied waal weer rak!  
't sjeet vuur hoap en es 'n teke vuur de korter bie kommende krismes,  
Dat in de Duusternis veuël mieë leech gieëf doeër de geboorte va Jezus Christus.

Zoeë, noe is de achtergrondj van Advent bie uch allemoal bekint,  
't is dus mieë dan alleen mer affille tot de Krismes begint!  
Es v' r dit soort periodes ins get mieë weërd mit zouwe geëve,  
Goof ooch dat weer 'n sjtukske mieë voldoening in 't leëve!

Ron Logister.

### **De zin van Krismes**

Ins per joar is 't zoeëwiet,  
Dan is 't weer de kristied.  
Zuus-te de luuj weer wie gekke gelle,  
En allerlei duur dinger besjtille!  
Ze dinke dat ze alleen mér recht kinne doeën aan dit fieës,  
Es 't cadeau en 't eëte duur is van pries.

De echte boodsjap wurd oet 't oog verloare,  
En dat is noch ummer dat 't kriskindj is geboare!  
Gans einfach in inne sjtal en oane duur dinger,  
Dus houd wat dat betruf aan der pols inne vinger!

Dink ins noa uëver dat kriskindj dat os de vrede kumt bringe,  
En woeë vuur vieër krisleedjes kinne zinge.  
Dat de rus oppe welt wilt beware,  
En os besjermt vuur alle gevoare!

Dus truuk noa de basis is 't devies,  
Went krismes is neet bedoelt om vuur jieëdere pries.  
Anger luuj mit cadeautjes of eëte af te troeve,  
En ze op die maneer te sjeete onger de doeve!

'n Cadeautje huërt d'r natuerlijk waal bie,  
Mér dink dizze krismes ooch inne kieër,  
Dat de boodsjap van krismes  
besjteet oeët hiel veuël mieër!

Ron Logister.

### **Nuuj Joar**

'n Joar sjteet weer op 't punt om te goan,  
De tied blief noe eenmoal neet sjtil sjtoan.  
Ooch al zouwe v'r dat waal ins geer wille,  
Dat hove v'r os joa neet te vertille.

Mer 'n nuuj joar sjteet op 't punt van beginne,  
'n nuje periode in 't leëve, kloar om te ontginne.  
Wat zouw os dat kommende joar goan bringe?  
Zouwe v'r 't ganze joar van vruid kinnen zinge?

Allemaal neet te beantwoerde vroage welle in os op,  
Allemaal goeije vuurnummes zitte in ozze kop!  
Loate v'r 't mer allemaal op os afkomme,  
En hope dat os dat nuje joar good zal bekomme!

Ron Logister.

### **'t Fieës van Sinterkloas**

Hoeëgroëë bakke  
Sjpanning op 't gezich  
Wisselend bang en blij  
De oge op de duër gerich  
Wiebele op de sjtool  
De nerve sjlont op de bloas  
Dat is 't kinjerfieës  
't fieës van Sinterkloas

Wiel Roeselers.

### **Al doeër ee**

Commercie bepoalt al  
In os plastikke welt  
Geveul en tradisie zint  
Noe ee moal minder weërd es geld  
Doe mos neet raar sjtoan te kieke  
Went aan 't inj van 't joar  
Sinterkloas mit narrekap op en poasjeier  
Zich in ene krisboom ophingt mit ingelehoar



Wiel Roeselers.

### **Confetti en Ingelehoar**

't Leëve is mieë  
Es jieëmere en surge  
't Is veuël mieë  
Es sjravele en sjurge  
Zieën de zon en de vuëgel  
Ruuk de blome en 't graas  
Geneet van 't leëve  
Hub die koeraasj  
't Leëve kint 'n fieës zun  
't Ganse joar  
De ene kieër confetti  
Dan mit ingelehoar

Wiel Roeselers.

### **Krisverhaal**

Of 't verhaal noe woar is  
Of kunstig verzonne  
Dat makt toch nieks oet  
Hoe 't allemoal om is begonne  
Is dat de luuj 'ns lieëre  
Uëver 't leëve noa te dinke  
Dat ze 'ns de tied numme  
Angere aandach te sjinke  
Went 't allemoal neet woar is  
Mer 't bringt get vruid oppe eërd  
Dan is doarom alleen al  
't Verhaal good weërd

Mer ich wil 't persé geleuve  
Ich houd 't verhaal vuur woar  
De gedanke der van is 't weërd  
Al miee dan tweeëdoezend joar

Wiel Roeselers.